



Bentiaraq Ottosen

UPA 2026/36-1

Atassut

28. April 2026

**Uunga siunnersuut: Tusagassiorfinnut tapiissuteqartarnej pillugu Inatsisartut Inatsisaata allangortinnissaa pillugu Inatsisartut Inatsisaat**

(Ilinniartitaanermut, Kultureqarnermut Timersornermut Ilageeqarnermullu Naalakkersuisoq)

Tusagassiuteqarnej toqqammaviuvoq tamat oqartussaaqataanitta ingerlalluartarneranut. Atassummiit pingaarluinnartutut isigaarput kiffaanngissuseqarnej aammalu inuussutissarsiutigalungu tusagassiisarfeqarnerup ingerlaavartumik Nunatsinni nukittorsarneqarnissaat.

Naalakkersuisut siunnersuutaat tusagassiorfinnut tapiissuteqartarnissamut nutarterinissaq tapersorsorparput, ilaatigut digitalimik nutaarsiassanik tusagassiissutinik ammaanissamut tungasut. Nunarsuaq allangorsimaqaaq maannakkumut inatsisip atuuttup sananeqarneraniit. Ullumikkut nutaarsiassanik atuneq digitalikkut atornejarnerulersimavoq, innuttaasut ujaruinerulersimapput nittartakkatigut, inoqatinut attaveqaatitigut aammalu aalajangersimasutigut atuisarnermikkut soorlu app-itigut (*applikation*). Taamaammat pisariaqalersimavoq ilumoorlunilu inatsit malinnaasariaqartoq ineriartornitsinnut.

Atassummiit aamma naqissuserumavarput tusangassiuteqarnej nutaanik unammillernartoqarmat tamat oqartussaaqataanitsinnut. Oqartoqartarpoq tusangassiuteqarnej pissaanerup sisamarigaa ullumikkulli ineriartorneq imaalersimavoq inoqatinut attaveqaatit annertuneruleralluttuinnartumik sunniuteqaleraluttuinnarlutik oqallitarnitsinnut, tamakkuali ileqqorissaarnikkut paasissutissanillu eqqortunik tungaveqarnissamut akisussaaffimmillu piumasaqaatitaqanngillat.

Annertusingaluttuinnartumik misigisalerparput oqallinneq inoqatinut attaveqatigiittarfinni kinaassutsiminnik isertuussillutik atuisutut paasissutissanik eqqunngitsunik aammalu inuttut saassussillutik inoqatiminnut pisinnaasartut. Tamatuma tatiginninneq inuiaqatigiinni nukillaarsarsinnaavaa pisariaqanngitsumillu avissaartuutsitsinermik pilersitsilluni. Taamaammat Atassut isumaqarpoq aamma tassunga sammisut maluginiarneqarlutik suliniarfigineqartariaqartut, qanoq akisussaaffeqarnerup nukittorsarneqarsinnaanera eqqarsaatigalugu oqallitarnitsinni, kiffaanngissuseqarluni oqaaseqarsinnaatitaaneq killilersunngikkaluarlugu.

Tassunga attuumassuteqartillugu qulakkiissallugu suli pingaarneruleriaannarpoq, tusangassiuteqarnej pitsaassuseqassasoq tatiginartussasorlu. Maluginiarparput ingerlaqqittumik aqqissuisoqarnikkut annertussusiliineq piumasaqaataaginnassasoq, tamatumalu qulakkiissavaa inuussutissarsiutaasumik ilumoorullugulu nutaarsiassatigut ingerlatsisinnaaneq.



Nutaarsiasseeriaaseq nutaajunerusoq eqqarsaatigalugu soorlu podcasts-iliorneq eqqarsaatigalugu, pingaaruteqarpoq immikkoortinnissaa tusangassuteqarnikkut imarisallit aammalu kulturikkut inooriaatsitigut aammalu aliikkusersuinikkut imarisallit. Atassutip naapertuilluartutut isigaa tapiissuteqartarnikkup aaqqiissuteqarnek nutaarsiassatigut tunngassuteqarnera aammalu inuiaqatigiinnut attuumassuteqartunik nutaarsiassanut tunngasuunera, inuiaqatigiinni tamat oqartussaaqataanitsinnut paasisutissatigut iluaqutaanera oqallinnissatsinnullu.

Naggasiutigalugu Atassummiit naqissuserusupparput, Nunatsinni tusangassiortussaaleqineq suli qitiulluni unamillernartuummat. Inatsisip nutarternera alloriarnerussaaq eqqortup tungaanut, politikikkulli aamma malitseqartariaqaralarpoq ilinniartitaaneq ukkassiffigalugu, tusangassiortussaaleqinerup iliuseqarfigineqarnissaa siunertaralugu, qanoq kajuminnarnerulersinneqarsinnaanera aammalu sinaakkutit eqqarsaatigalungit.

Taama oqaaseqaateqarluta Atassummiit siunnersuut ilalerlugu, Kultureqarnermut, Ilinniartitaanermut Ilisimatusarnermut Ilageeqarnermullu ataatsimiititaliamut aappassaaneerreqartigani ingerlaqqinnissaa innersuupparput.